

DOMENIE XXXIII «VIE PAL AN»

**Antifone di jentrade Jer 29,11.12.14**

**Al** dîs il Signôr: Jo o cognòs progjets di pâs e no di disgraciis;  
mi clamarêš e jo us scoltarai  
e us tornarai a menâ dongje di ducj i lûcs  
là che us ài dispierdûts.

**Colete**

Signôr, nestri Diu, danus la gracie  
di cjatâ simpri la nestre contentece tal jessiti fedêi  
parcè che dome servint chel che al à creadis dutis lis robis buinis  
o podarìn vê gjonde complete e eterne.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

**PRIME LETURE Pr 31,10-13.19-20.30-31**

**Lis mans de brave femine a fasin simpri alc.**

Dal libri dai Proverbis  
Une brave femine cui le cjatial?  
Il so valôr al è plui grant che no lis perlis.  
Il cûr dal so om al sta fidât sun jê,  
e al varà simpri ce vuadagnâ.  
I dà ce che al è ben, no il mâl,  
par ducj i dîs de sô vite.  
Si interesse de lane e dal fîl,  
lis sôs mans a fasin simpri alc.  
E cjape tes sôs mans la gurlete,  
i siei dêts si messedin daprûf dal fûs.  
E spalanche lis sôs mans al puar  
e i siei dêts ju slungje viers dal biât.  
Cence tignince al è il biel fâ, un nuie la bielece,  
la femine savie chê sî che e va laudade.  
Daitji ce che a àn fat lis sôs mans,  
e lis sôs voris che le laudin a lis puartis de citât.  
Peraule di Diu.

**SALM RESPONSORIÂL dal Salm 127**

**R.** Furtunât chel che al cjamine pai trois dal Signôr.

Furtunâts chei che a rispjetin il Signôr  
e pai siei trois a cjaminin!  
De fadie des tôs mans tu mangjarâš;  
tu varâš furtune e ben di ogni sorte. **R.**

La tô femine tant che une vît che e bute  
te intimitât de tô cjase;  
i tiei fîs tant che menadis di ulîf  
tor ator de tô taule. **R.**

Ve cemût che al è benedît  
l'om che al rispiete il Signôr.

Che il Signôr ti benedissi di Sion,  
par che tu gjoldis de bondance di Jerusalem  
ducj i dîs de tô vite. **R.**

### **SECONDE LETURE 1 Ts 5,1-6**

**Come un lari di gnot, cussì e rive la zornade dal Signôr.**

De prime letare di san Pauli apuestul ai Tessalonicês

Fradis, par chel che al rivuarde il timp e l'ore, nol covente che us scrivìn. Di fat o savês benon di bessôi che la zornade dal Signôr e rive come un lari di gnot. Cuant che us disaran: «Pâs e sigurece», in chê volte a colp e plombarà sore di vualtris la ruvine, come lis dois dal part a une femine che e sta par parturî, e no 'nt scjamparà un.

Ma vualtris, fradis, no sês intal scûr, di mût che chê zornade us capiti a tradiment come un lari; di fat vualtris o sês ducj fîs de lûs e fîs dal dì; nô no sin ni de gnot ni dal scûr. Par chel no durmìn come chei altris, ma o veglìn e o savìn misurâsi.

Peraule di Diu.

### **CJANT AL VANZELI Mt 24,42.44**

**R.** Aleluia, aleluia.

Veglait e tignîtsi pronts,  
parcè che no savês in ce dì che al ven il Signôr.

**R.** Aleluia.

### **VANZELI Mt 25,14-30**

**Tu sês stât fedêl tal pôc: jentre te gjonde dal to paron.**

Dal vanzeli seont Matieu

In chê volte, Jesù al disè ai siei dissepui cheste parabule: «Un om, stant par partî, al clamà i siei servidôrs e ur consegnà la sô robe: a un i dè cinc talents, a un altri doi e a un altri un; a ognidun seont la sô capacitât, po al partì. Cence pierdi timp, chel che al veve vûts cinc talents al lè a traficâju e int vuadagnà altris cinc. Compagn chel che al veve vûts doi talents int vuadagnà ancje lui altris doi. Ma chel che al veve vût dome un talent al lè a sgjavâ une buse te tiere e al platà i bêçs dal so paron. Tant timp dopo, al rive il paron di chei servidôrs e ju clame a fâ i conts. Si presentà chel che al veve vûts cinc talents e int puartà altris cinc disint: Paron, tu mi âs dâts cinc talents. Ve, ind ài vuadagnâts altris cinc. I disè il paron: Ben, servidôr bon e fedêl; za che tu sês stât fedêl tal pôc, ti darai podê tal tant; jentre te gjonde dal to paron. Po si presentà chel dai doi talents e al disè: Paron, tu mi âs dâts doi talents. Ve, ind ài vuadagnâts altris doi. I disè il paron: Ben, servidôr bon e fedêl; za che tu sês stât fedêl tal pôc, ti darai podê tal tant; jentre te gjonde dal to paron. Par ultin si presentà ancje chel che al veve vût dome un talent e al disè: Paron, o savevi che tu sês un om dût, che tu seselis là che no tu âs semenât e tu cjapis sù là che no tu âs butât; par chel o ài vude pôre e o soi lât a platâ il to talent sot tiere. Ve, cjape ce che al è to. Ma il paron i rispuindè: Servidôr trist e poltron, tu savevis che jo o seseli là che no ài semenât e o cjapi sù là che no ài butât; par chel tu varessis vût di dâur i miei bêçs ai bancjîrs, di mût che, tornant dongje, o varès podût ritirà il gno cul interès. Poben, cjolêtji il talent e daitlu a di chel che ind à dîs. Di fat a di chel che al à i sarà dât e al varà bondance, ma a di chel che nol à i sarà cjolt ancje ce che al à. E il servidôr poltron butaitlu fûr tal scûr; li al sarà dut un vaî e un crustâ di dincj».

Peraule dal Signôr.

### **Su lis ufiertis**

Signôr, fâs che il regâl  
presentât denant dai vôi de tô maiestât  
nus otegni la gracie de religjon  
e nus siguri un'eternitât furtunade.

Par Crist nestri Signôr.

**Antifone a la comunion Sal 72,28**

Par me il gno ben al è dome stâ dongje di Diu,  
tal Signôr Idiu o ài metût il gno ripâr.

**O ben: Mc 11,23.24**

Us al dîs in veretât: dut ce che o domandais te preiere,  
crodêt di vêlu za vût e us sarà dât, al dîs il Signôr.

**Daspò de comunion**

O vin ricevûts, Signôr, i regâi dal to sant misteri  
e ti preìn cun dute umiltât  
che al zovi a fâ cressi il nestri amôr  
ce che to Fi nus à ordenât di fâ in sô memorie.  
Par Crist nestri Signôr.